

妙法蓮花經論優波提舍

婆藪般豆造 勒那摩提共僧朗等譯



妙法蓮花經論優波提舍

序品	4
A01 序分成就	5
B01 示現一切諸法門中最勝成就	6
B02 示現自在功德成就	6
A02 眾成就	6
B01 數成就	6
B02 行成就	7
C01 諸聲聞修小乘行	7

C02 諸菩薩修大乘行	13
C03 諸菩薩隨時示現能行大乘	16
C04 出家菩薩威儀	17
B03 攝功德成就	17
B04 威儀如法住成就	17
A03 如來欲說法時至成就	18
A04 所依說法隨順威儀住成就	21
A05 依止說因成就	22
A06 示現大眾現前欲聞法成就	23
A07 文殊師利答成就	25

方便品.....	30
譬喻品.....	52

南無本師釋迦牟尼佛

自歸於佛 當願眾生 紹隆佛種 發無上意

自歸於法 當願眾生 深入經藏 智慧如海

自歸於僧 當願眾生 統理大眾 一切無礙

妙法蓮花經論優波提舍

序品

如是我聞：一時，佛住王舍城耆闍崛山中。

與大比丘眾，萬二千人俱，皆是阿羅漢，諸漏已盡、無復煩惱、心得自在、善得心解脫、善得慧解脫、心善調伏、人中大龍、應作者作、所作已辦、離諸重擔、逮得己利、盡諸有結、善得正智心解脫、一切心得自在、到第一彼岸。

菩薩摩訶薩，八萬人，皆於阿耨多羅三藐三菩提不退轉，皆得陀羅尼、大辯才樂說、轉不退法輪、供養無量百千諸佛、於諸佛所種諸善根、常為諸佛之所稱歎、以大慈悲而修身心、善入佛慧、通達大智、到於彼岸、名稱普聞無量世界、能度無數百千眾生。

此法門中初第一品，明七種功德成就。何等為七？

①序分成就，②眾成就，③如來欲說法時至成就，④所依說法隨順威儀住成就，⑤依止說因成就，⑥大眾現前欲聞法成就，⑦文殊師利答成就。

A01 序分成就

又，序分成就者，此法門示現二種義成就。何等為二？

①示現一切諸法門中最勝成就故，②示現自在功德成就故。

B01 示現一切諸法門中最勝成就

如王舍城勝餘一切城舍故，耆闍崛山勝餘諸山故。

B02 示現自在功德成就

如經：如是我聞：一時，佛住王舍城耆闍崛山中。故。

A02 眾成就

眾成就者，有四種義成就。何等為四？

①數成就，②行成就，③攝功德成就，④威儀如法住成就。

B01 數成就

謂大眾無數故。

B02 行成就

有四種：

C01 諸聲聞修小乘行

皆是阿羅漢等者十六句，示現聲聞功德成就故。

阿羅漢功德成就者，彼十六句示現三種門攝義應知。何等三門？

①上上起門，②總別相門，③攝取事門。

D01 上上起門

①諸漏已盡故，名為羅漢。

②以心得自在故，名諸漏已盡。

③諸漏已盡故，名為阿羅漢。

- ④以心無煩惱故，名心得自在。
- ⑤以善得心解脫、善得慧解脫故，名心得自在。
- ⑥以遠離能見所見故，名無復煩惱。
- ⑦已善得心解脫、慧解脫故，名心善調伏。
- ⑧人中大龍者，行諸惡道，如平坦路，無所拘礙。
- ⑨應行者已行，應到處已到故。
- ⑩應作者已作，人中大龍已盡對治，降伏煩惱怨敵故。
- ⑪所作已辦者，更不後生，如相應事已成故。
- ⑫離諸重擔者，已應作者作、所作已辦，後生重擔已捨故。
- ⑬逮得己利者，已捨重擔，證涅槃故。

- ⑭盡諸有結者，已逮得己利，斷諸煩惱因故。
- ⑮善得正智心解脫者，諸漏已盡故。
- ⑯一切心得自在者，善知見道修道智故。
- ⑰到第一彼岸者，善得正智心得解脫、善得神通無諍三昧等諸功德故。
- ⑱大羅漢等者，心得自在，到彼岸故。
- ⑲眾所知識者，諸王、王子、大臣、帝釋、梵天王等皆識知故。
- ⑳復聲聞、菩薩、佛等是勝智，彼勝智者皆善知故，名眾所知識。

D02 總別相門

總句：皆是羅漢。

別句：彼羅漢名，有十五種義應知：

- ①應受飲食臥具供養恭敬等故。
- ②應將大眾教化一切故。
- ③應入聚落城邑等故。
- ④應降伏諸外道等故。
- ⑤應以智慧速觀察法故。
- ⑥應不疾不遲說法，如法相應不疲倦故；
- ⑦應靜坐空閑處，飲食衣服一切資生不積不聚，少欲知足故。
- ⑧應一向行善行，不著諸禪故。
- ⑨應行空聖行故；
- ⑩應行無相聖行故。

- ⑪應行無願聖行故。
- ⑫應降伏世間禪淨心故。
- ⑬應起諸通勝功德故；
- ⑭應證第一義功德故。
- ⑮應如實知同生眾得諸功德，為利益一切眾生故。

D03 攝取事門

此十五句攝取十種功德，示現可說果、不可說果故：

- ①攝取得功德二句示現，如經：諸漏已盡、無復煩惱。故。
- ②三句攝取諸功德：
 - 一句降伏世間功德，如經：心得自在。故；

二句降伏出世間學人功德，如經：善得心解脫、善得慧解脫。故。

③攝取不違功德，隨順如來教行故，如經：心善調伏。故。

④攝取勝功德，如經：人中大龍。故。

⑤攝取所應作勝功德。所應作者，依法供養恭敬尊重如來故，如經：應作者作。故。

⑥攝取滿足功德，滿足學地故，如經：所作已辦。故。

⑦三句攝取過功德：

(1)過愛故，如經：離諸重擔。故

(2)過求命供養恭敬故，如經：逮得己利。故

(3)過上下界已過學地故，如經：盡諸有結。故。

⑧攝取上上功德，如經：善得正智心解脫。故。

⑨攝取應作利益眾生功德，如經：一切心得自在。故。

⑩攝取上首功德，如經：到第一彼岸。故。

C02 諸菩薩修大乘行

皆不退轉阿耨多羅三藐三菩提等者十三句，示現菩薩功德成就故。

彼諸菩薩十三句功德二門攝應知：

D01 上支下支門

所謂總相、別相應知。

總相：皆於阿耨多羅三藐三菩提不退轉。

別相：彼不退轉，有十種示現：

①住聞法不退轉，如經：皆得陀羅尼。故。

②樂說不退轉，如經：大辯才樂說。故。

③說不退轉，如經：轉不退法輪。故。

④依止善知識不退轉，以身心業依色身攝取故，如經：供養無量百千諸佛。
故，於諸佛所種諸善根。故。

⑤斷一切疑不退轉，如經：常為諸佛之所稱歎。故。

⑥為何等何等事說法，入彼彼法不退轉，如經：以大慈悲而修身心。故。

⑦入一切智如實境界不退轉，如經：善入佛慧。故。

⑧依我空法空不退轉，如經：通達大智。故。

⑨入如實境界不退轉，如經：到於彼岸。故。

⑩應作所作住持不退轉，如經：能度無量百千眾生。故。

D02 攝取事門

示現諸菩薩住何等清淨地中，因何等方便、何等境界中應作所作故。

地清淨者，八地已上三地，無相行寂靜清淨故。

方便者有四種：

①攝取妙法方便，住持妙法，以樂說力為人說故。

②攝取善知識方便，以依善知識所作應作故。

③攝取眾生方便，以不捨眾生故。

④攝取智方便，以教化眾生令入彼智故。

境界者易解。

復有攝取事門，示現諸地攝取勝功德，不同二乘功德故。

①八地者，無功用智，不同下、上故。

不同下者，下功用行，不能動故。

不同上者，上無相行不能動，自然而行故。

②於九地中，得勝進陀羅尼門，具足四無礙自在故。

③於第十地中，不退轉法輪，得佛受位，如轉輪王子故，以得同攝功德故。

C03 諸菩薩隨時示現能行大乘

如毘陀婆羅等十六人，具足菩薩不可思議事，而能示現種種形相，優婆塞、優婆夷、比丘、比丘尼等故；

C04 出家菩薩威儀

一定不同在家菩薩故。

B03 攝功德成就

示現依何處、依何心、依何智、依何境界行、依何等能辦故。

依何處者，依善知識故。

依何心者，我依眾生心教化，畢竟利益一切眾生故。

依何智者，依三種智：①授記密智，②諸通智，③真實智。

依何等境界行、依何等能辦者，即三種智攝應知。

B04 威儀如法住成就

威儀如法住成就者，有四種示現。何等為四？①四眾圍繞，②前後，③供養

恭敬，④尊重讚歎。如經：爾時，世尊四眾圍繞，供養恭敬、尊重讚歎。故。

A03 如來欲說法時至成就

如來欲說法時至成就者，為諸菩薩說大乘經故。此大乘修多羅有十七種名，顯示甚深功德應知：

- ①名無量義經者，成就字義故，以此法門說彼甚深妙境界法故。甚深妙境界者，諸佛如來最勝境界故。
- ②名最勝修多羅者，三藏中最妙勝藏成就故。
- ③名大方廣者，無量大乘門隨眾生根住持成就故。
- ④名教菩薩法者，為教化根熟菩薩，隨器法成就故。
- ⑤名佛所護念者，依佛如來，有此法故。

- ⑥名一切諸佛祕密法者，此法甚深，如來知故。
- ⑦名一切佛藏者，如來功德三昧之藏在此經故。
- ⑧名一切諸佛密處者，根未熟眾生，非法器，不與故。
- ⑨名能生一切諸佛者，聞此法門，能成佛菩提故。
- ⑩名一切諸佛道場者，聞此法門，能成阿耨多羅三藐三菩提，非餘修多羅故。
- ⑪名一切諸佛所轉法輪者，此法門能破一切諸障故。
- ⑫名一切諸佛堅固舍利者，謂如來真如法身，於此修多羅不壞故。
- ⑬名一切諸佛大巧方便經者，依此法門，成大菩提，已為眾生說天人聲聞辟支佛等法故。

⑭名說一乘經者，此法門顯示如來阿耨多羅三藐三菩提究竟之體，二乘非究竟故。

⑮名第一義住者，此法門即是如來法身究竟住處故。

⑯名妙法蓮花者，有二種義。何等二種？

(1)出水義，不可盡出離小乘泥濁水故。復有義，蓮花出泥水，喻諸聲聞入如來大眾中坐，如諸菩薩坐蓮花上，聞說無上智慧清淨境界，證如來密藏故。

(2)花開者，眾於大乘中心怯弱，不能生信故，開示如來淨妙法身，令生信心故。

⑰名法門者，攝成就故。攝成就者，攝取無量名句字身、頻婆羅阿闍婆等偈

故。

此十七句法門者是總，餘句是別故。如經：為諸菩薩說大乘經名無量義。如是等。

A04 所依說法隨順威儀住成就

所依說法隨順威儀住成就者，示現依何等法說法。依三種法故：

①依三昧成就故，以三昧成就二種示現。何等為二？

(1)成就自在力，身心不動故。

(2)離一切諸障，隨自在力故。此自在力有二種：

1.為隨順眾生，示現對治，攝取覺菩提分法故。

2.為對治無量世來堅執煩惱故，如經：說此經已，結跏趺坐，入於無量

義處三昧。等。

②依器世間。

③依眾生世間，震動世界及知過去無量劫事等故。如經：是時，天雨曼陀羅花，乃至歡喜合掌，一心觀佛。故。

A05 依止說因成就

彼諸大眾現見異相不可思議事，如來應為我說，渴仰欲聞生希有心，名依止說因成就。是故放大光明，示現諸世界中種種事故。先示現外事六種震動等，次示現此法門內證深密法故。

又依器世間、眾生世間，數種種、量種種，具足煩惱差別、具足清淨差別，佛法、弟子差別，示現三寶故。

復乘差別，有世界有佛、有世界無佛，令眾生見修行者未得果、得道者已得果。如經：諸修行得道者。故。

數種種者，示現種種觀故。略說四種觀：①食，②聞法，③明修行，④樂。如經：爾時，佛放眉間白毫相光，乃至以佛舍利起七寶塔。故。

行菩薩道者，教化眾生依四攝法方便攝取應知，如經中說，當推取。

A06 示現大眾現前欲聞法成就

問一人，多人欲聞生希有心，是故唯問文殊師利。如是，示現世尊弟子隨順法不相違故。

今佛世尊現神變相者，為何等義？為現大相因故。為大相者，為說《妙法蓮花經》故現大瑞相，為說所得妙法不可思議等文句故。

有二種法故推文殊師利：①現見諸法，②離諸因緣，自心成就彼法故。

示現種種瑞相者，示現彼彼事，如彼事現沒住滅應知，以文殊師利能記彼事故，以文殊師利所作成就因果成就現見彼法故。

所作成就者有二種：①功德成就，②智慧成就。

因成就者，一切智成就。因緣者，相也。果者，說大法。

種種佛國土者，示現彼國土中種種差別應知。

淨妙國土者，無煩惱眾生住處故。如經：照於東方萬八千世界，乃至悉見彼佛國界莊嚴。故。

如來為上首者，諸菩薩等依如來住故，以如來於彼國土一切大眾中得自在故。如經：又見彼土現在諸佛。如是等故。

A07 文殊師利答成就

明聖者文殊師利菩薩以宿命智，現見過去因果相，成就十種事如現在前，是故能答彌勒。

現見過去因相者，自見己身於彼諸佛國土中修種種行事故。

現見過去果相者，文殊師利自見己身是過去妙光菩薩，於彼佛所聞此法門為眾生說故。

成就十種事者，何等為十？

- ①現見大義因成就；
- ②現見世間文字章句甚深意因成就；
- ③現見希有因成就；

- ④現見勝妙因成就；
- ⑤現見受用大因成就；
- ⑥現見攝取一切諸佛法輪因成就；
- ⑦現見善堅實如來法輪因成就；
- ⑧現見能進入因成就；
- ⑨現見憶念因成就；
- ⑩現見自身所經事因成就。

大義因成就者，八句示現應知：

- ①欲轉大法輪，②欲雨大法雨，③欲擊大法鼓，④欲建大法幢，⑤欲燃大法燈，⑥欲吹大法蠶，⑦欲不斷大法鼓，⑧欲說大法。

此八句示現如來欲說大法等故。

何等為八種大義？謂：疑者斷疑故，已斷疑者增長淳熟智身故。根熟者為說二種密境界，謂：聲聞密境界、菩薩密境界。

大法鼓二句，示現以遠聞故。

入密境界者，令進取上上清淨義故。

取上上清淨義者，進取一切智現見故。

取一切智現見者，為一切法建立名字章句義故。

建立名字章句義者，令入不可說證智轉法輪故，現見世間名字章句意甚深因成就故。如經：我於過去諸佛曾見此瑞，乃至故現斯瑞。故。

現見希有因成就者，無量時不可得故。

不可思議不可稱不可量者，示現過彼阿僧祇劫不可得故。

復示現五種劫：①夜，②晝，③月，④時，⑤年，示現彼無量無邊劫故。如經：如過去無量無邊不可思議阿僧祇劫，爾時有佛號日月燈明，乃至得阿耨多羅三藐三菩提，成一切種智。故。

現見勝妙因成就者，以諸佛菩薩自受用示現故。如經：次復有佛，亦名日月燈明，乃至所可說法，初中後善。故。

現見受用大因成就者，是時王子受勝妙樂，各捨出家，復彼大眾於爾許時不生疲倦心故。如經：其最後佛，未出家時，乃至佛授記已，便於中夜入無餘涅槃。故。

現見攝取一切諸佛轉法輪因成就者，法輪不斷故。如經：佛滅度後，妙光菩

薩持妙法蓮花經，滿八十小劫，為人演說。故。

現見堅實如來法輪因成就者，佛滅度後，無量時說法故。如經：日月燈明佛八子，皆師妙光，乃至皆令其堅固阿耨多羅三藐三菩提。故。

現見進入因成就者，彼諸王子得大菩提故。如經：是諸王子，乃至皆成佛道故。

現見憶念因成就者，為他說法利益他故。如經：其最後成佛者，名曰燃燈，乃至尊重讚歎。故。

現見自身所經事因成就者，以自身受勝妙樂故。如經：彌勒！當知：乃至佛所護念。故。

汝號求名者，示現知過去事故，復示現得彼法具足故。

方便品

爾時，世尊入甚深三昧，正念不動，以如實智觀，從三昧安詳而起。起已。

告舍利弗：諸佛智慧，甚深無量。其智慧門，難見、難覺、難知、難解、難入。如來所證，一切聲聞辟支佛所不能知。

何以故？舍利弗！如來。應。正遍知已曾親近供養無量百千萬億那由他佛。於諸佛所，盡行諸佛所修阿耨多羅三藐三菩提法。

舍利弗！如來已於無量百千億那由他劫，勇猛精進，所作成就，名稱普聞。

舍利弗！如來畢竟成就希有之法。

舍利弗！難解之法，如來能知。

舍利弗！難解法者，諸佛如來，隨宜所說，意趣難解，一切聲聞辟支佛所不

能知。

何以故？舍利弗！諸佛如來自在說因成就故。

舍利弗！如來成就種種方便、種種知見、種種念觀、種種言辭。

舍利弗！吾從成佛已來，於彼彼處，廣演言教，無數方便引導眾生，於諸著處，令得解脫。

舍利弗！如來知見方便，到於彼岸。

舍利弗！如來知見，廣大深遠，無障無礙，力、無畏、不共法、根、力、菩提分、禪定、解脫三昧、三摩跋提，皆已具足。

舍利弗！諸佛如來深入無際，成就一切未曾有法。

舍利弗！如來能種種分別巧說諸法，言辭柔軟，悅可眾心。

止，舍利弗！不須復說。

舍利弗！佛所成就，第一希有難解之法。

舍利弗！唯佛與佛說法，諸佛如來能知彼法究竟實相。

舍利弗！唯佛如來知一切法。

舍利弗！唯佛如來，能說一切法，何等法、云何法、何似法、何相法、何體法。何等、云何、何似、何相、何體，如是等一切法，如來現見非不現見。

自此已下，示現所說法因果相應知。

如經：爾時，世尊入甚深三昧，正念不動，以如實智觀，從三昧安詳而起。

起已。告舍利弗：者，示現如來得自在力故，如來入定，無能驚寤故。

⑩何故告舍利弗，不告餘聲聞等？

⑧隨深智慧，與如來相應故。

⑨何故不告諸菩薩？

⑩有五種義：

①為諸聲聞所作事故，

②為令聲聞迴趣大菩提故，

③護諸聲聞恐怯弱故，

④為令餘人善思念故，

⑤為諸聲聞不起所作已辦心故。

諸佛智慧甚深無量者，為諸大眾，生尊重心，畢竟欲聞如來說故。

甚深者，顯示二種甚深義應知。何等為二？

①證甚深，謂諸佛智慧，甚深無量故，

②阿含甚深，謂智慧門故。

甚深者是總，餘者是別。

證甚深者，有五種：①義甚深，依何等義甚深故。②實體甚深。③內證甚深。④依止甚深。⑤無上甚深。

甚深者，謂大菩提故。大菩提者，如來所證阿耨多羅三藐三菩提故。

又，甚深者，一切聲聞辟支佛所不能知故。

智慧者，謂一切種一切智智義故。如經：諸佛智慧，甚深無量，其智慧門，難見、難覺、難知、難解、難入，一切聲聞、辟支佛所不能知。故。

智慧門者，謂說阿含。

義甚深者，示現有八種：

- ①受持讀誦甚深，如經：舍利弗！如來．應．正遍知，已曾親近供養無量百千萬億那由他佛。故。
- ②修行甚深，如經：於諸佛所，盡行諸佛所修阿耨多羅三藐三菩提法。故。
- ③果行甚深，如經：舍利弗！如來已於無量百千億劫勇猛精進所作成就故。
- ④增長功德心甚深，如經：名稱普聞。故。
- ⑤快妙事甚深，如經：成就希有法。故。
- ⑥無上甚深，如經：舍利弗！難解之法，如來能知。故。
- ⑦入甚深，入甚深者，名字章句意難得，自在住持不同外道，說因緣法，名為甚深。如經：舍利弗！難解法者，諸佛如來隨宜所說，意趣難解。故。

⑧不共聲聞辟支佛所作，住持甚深，如經：一切聲聞辟支佛所不能知。故。
如是，說妙法功德已，次說如來法師功德成就應知。如經：何以故？諸佛如
來自在說因成就。故。

如來成就四種功德故，能度眾生。何等為四？

①住成就，如經：如來成就種種方便故。種種方便者，從兜率天退，乃至示
現入涅槃。故。

②教化成就，如經：種種知見故。種種知見者，示現染淨諸因。故。

③功德畢竟成就，如經：種種念觀故。種種念觀者，以說彼法成就因緣如法
相應。故。

④說成就，如經：種種言辭故。種種言辭者，以四無礙，依何等何等名字章

句，隨何等何等眾生能受為說。故。

復有義：種種方便者，示現外道邪法，如是如是種種過失故。示現諸佛正法，如是如是種種功德故。如經：吾從成佛已來，廣演言教，無數方便引導眾生，於諸著處令得解脫。故。

復無數方便者，方便令入諸善法故。

復方便者，斷諸疑故。

復方便者，令入增上勝智故。

復方便者，依四攝法攝取眾生令得解脫故。

諸著者，彼處處著，或著界、或著諸地、或著分、或著乘故。

著界者，著欲、色、無色界故。

著地者，著戒取三昧初禪定地，乃至非非想及滅盡定地故。

著分者，著在家、出家分故。

著在家分者，著己同類作種種業邪見等故。

著出家分者，著名聞利養種種諸覺煩惱等故。

著乘者，著聲聞乘、菩薩乘故。

著聲聞乘者，樂持小乘戒，求須陀洹、斯陀含、阿那含、阿羅漢等故。

著大乘者，著利養供養恭敬等，著分別觀種種法相乃至佛地故。

復種種知見者，自身成就不可思議境界，與聲聞菩薩故。如經：舍利弗！如來知見方便，到於彼岸。故。到彼岸者，勝餘一切諸菩薩故。

復種種念觀者，如經：舍利弗！如來知見，廣大深遠，無障、無礙，力、無

畏、不共法、根、力、菩提分、禪定、解脫三昧、三摩跋提，皆已具足。故。

又

①成就可化眾生，依止善知識成就故。

②成就根熟眾生，令得解脫故。

③成就力者，得自在淨降伏故。

④說成就者，有七種：

(1)種種成就，如經：舍利弗！諸佛如來，深入無際，成就一切未曾有法。
故。

(2)言成就，得五種美妙音聲說法，如經：如來能種種分別巧說諸法，言辭
柔軟，悅可眾心。故。

- (3)相成就，如經：止，舍利弗！不須復說。故。有法器眾生，心已滿足故。
- (4)堪成就，一切可化眾生，知如來成就第一希有功德，能說法故，如經：舍利弗！佛所成就第一希有難解之法。故。
- (5)無量種成就，說不可盡，如經：舍利弗！唯佛與佛說法，諸佛如來能知彼法究竟實相。故。實相者，謂如來藏法身之體不變故。
- (6)覺體成就，如來所說一切諸法，如來自證得故，如經：舍利弗！唯佛如來知一切法。故。
- (7)隨順眾生意，為說修行法成就，彼法何等如是等，如經：舍利弗！唯佛如來能說一切法。故。

(1)種種法門攝取眾生故，(2)令不散亂住故，(3)令取故，(4)令得解脫故，(5)令彼修行成就得對治法故，(6)能令修行進趣成就故，(7)令得修行不失故。此七種法，為諸眾生、自身所作成就故。

又，與教化成就者，依證法故。

又，說成就者，依說法故。

此二種法，如向前說。

依此二種法，有何次第而得修行？即彼前文句再說應知。

又，依證法有五種：①何等法，②云何法，③何似法，④何相法，⑤何體法故。

何等法者，聲聞法、辟支佛法、佛法故。

云何法者，起種種事說故。

何似法者，依三種門得清淨故。

何相法者，三種義一相法故。

何體法者，無二體故。無二體者，無量乘唯一佛乘，無二乘故。

復有義：何等法者，謂有為法、無為法。

云何法者，謂因緣法、非因緣法等。

何似法者，謂常法、無常法，如是等。

何相法者，生等三相法、不生等三相法。

何體法者，謂五陰體、非五陰體。

又，何似法者，謂無常法、有為法、因緣法。

又，何相法者，謂可見相等法。

又，何體法者，謂五陰能取可取，五陰是苦集體故，五陰者是道諦體。

復有依說法：

何等法者，謂名句字身故。

云何法者，依如來所說法故。

何似法者，能教化可化眾生故。

何相法者，依音聲取故，以依音聲取彼法故。

何體法者，假名體法相故。

自此以下，依三種義示現：①決定義，②疑義，③依何事疑義。

①決定義者，有聲聞方便證得深法作決定心，於聲聞道中得方便涅槃證故。

如是三種證法，示現有為、無為法故。如經：爾時，大眾中有諸聲聞漏盡阿羅漢，乃至亦得此法到於涅槃。故。

②疑義者，謂聲聞、辟支佛不能知故，是故生疑。如經：而今不知是義所趣故。

③依何事疑者，如來說聲聞解脫與我解脫不異，是故生疑。生疑者，生因中疑：此云何？云何如來數數說甚深境界，前說甚深、後說甚深，不同聲聞。如是等，是故生疑。如經：爾時，舍利弗知四眾心疑，乃至而說偈言故。

自此已下，依四種事說：①決定心，②因授記，③取授記，④與授記應知。

①云何決定心？已生驚怖者，令斷驚怖，為利益二種人故，如來有決定心。

此驚怖，有五種應知：

(1)損驚怖，如所聞聲，取以為實，謗無大乘，而作是言：如來說言阿羅漢究竟涅槃，我畢竟取如是涅槃，是故羅漢不入涅槃故。

(2)多事驚怖，以大乘眾生如是心：我無量無邊劫行菩薩行，生驚怖心，起取異乘心故。

(3)顛倒驚怖，分別我我所身，見不善法故。

(4)悔驚怖，悔驚怖者，謂大德舍利弗等：我不應證如是小乘法自止，即此悔心，名為驚怖應知。

(5)誑驚怖，謂增上慢聲聞作如是心：云何如來誑於我等故。

②因授記者，如經：止，止，舍利弗！不須復說。若說是事，一切世間諸天人等皆生驚怖。故。

因授記生驚怖者，有三種義：

(1)欲令彼大眾推覓甚深境界故；

(2)欲令大眾生尊重心畢竟欲聞故；

(3)為令增上慢聲聞離法座而去故。

請示現過去無量佛教化眾生，如經：是會無數，乃至聞佛所說則能敬信。故。

請示現現在佛教化眾生，如經：今此會中，如我等比，乃至長夜安隱多所饒益。故。

③取授記者，以舍利弗等欲得授記，如經：告舍利弗：汝以三請，豈得不說？汝今諦聽。如是等故。

④與授記者，有六種應知：(1)未聞令聞，(2)說，(3)依何等義，(4)令住，(5)依法，(6)遮。

(1)未聞令聞者，如經：舍利弗！如是妙法，諸佛如來，時乃說之，如優曇花。如是等。

(2)說者，如經：舍利弗！我以無數方便，種種因緣譬喻言辭演說諸法。如是等。種種因緣者，謂三乘。彼三乘者，唯名字章句說，非有實義故，以彼實義不可說故。

(3)依何等義者，如經：舍利弗！諸佛世尊，唯以一大事因緣故出現於世。如是等故。彼一大事者，依四種義應知。何者為四？

1.無上義，除一切智智，更無餘事，如經：欲開佛知見，令眾生知得清

淨故出現於世。佛知見者，如來能證，如實知彼義故。

2.同義，以聲聞、辟支佛、佛法身平等故，如經：欲示眾生佛知見故，出現於世。故。法身平等者，佛性法身更無差別故。

3.不知義，以一切聲聞、辟支佛不知彼真實處故。不知真實處者，不知究竟唯一佛乘故。如經：欲令眾生悟佛知見故，出現於世。

4.為令證不退轉地，示現與無量智業故，如經：欲令眾生入佛知見道故，出現於世。

又，示者，為諸菩薩有疑者，令知如實修行故。

又，悟入者，未發菩提心者令發心故，已發心者令入法故。

復，悟者，令外道眾生生覺悟故。

復，入者，令得聲聞果者入大菩提故。

(4)令住者，如經：舍利弗！如來但以一佛乘故，為眾生說法。

(5)依法者，如經：舍利弗！過去諸佛以無量無數方便，種種譬喻因緣念觀方便說法，是法皆為一佛乘。故。如是等譬喻者，如依牛，有乳、酪、生酥、熟酥、醍醐，醍醐為第一。小乘如乳，大乘如醍醐故。此譬唯明大乘無上，諸聲聞等亦同大乘無上故。聲聞同者，示諸佛如來法身之性同，諸凡夫、聲聞、辟支佛等，法身平等無差別故。此譬喻示現因緣如向說。念觀者，於小乘諦中人無我等；於大乘諦中真如、法界、實際、人無我、法無我等觀故。方便者，小乘中觀陰界入，厭苦離苦，得解脫故；於大乘中修諸波羅蜜、四攝法，攝取自身他身利益對治法故。

(6)遮者，如經：舍利弗！十方世界中，尚無二乘，何況有三。如是等故。

無二乘者，無二乘涅槃，唯佛如來證大菩提，究竟滿足一切智慧名大涅槃，非諸聲聞辟支佛等有涅槃法，唯一佛乘故。一佛乘者，依四種義說應知。

如來依此六種授記，是故前說何等法、云何法、何似法、何相法、何體法。

如是示現何等法者，謂未曾聞故。

云何法者，謂種種言語譬喻說故。

何似法者，唯為一大事故。

何相法者，為隨眾生器說佛法故。

何體法者，唯一乘體故。一乘體者，謂諸佛如來平等法身，聲聞、辟支佛乘

非彼平等法身之體，以因果行觀不同故。

自此已下，說法為斷四種疑應知。何等四種？

①何時說？②云何知增上慢？③云何堪說？④云何不成妄語？

①何時說者，諸佛如來於何等時起種種方便說法，為斷彼疑。如經：佛告舍利弗：諸佛出於五濁惡世，所謂劫濁等。故。

②云何知增上慢者，如來不為增上慢人說法，云何知彼是增上慢？為斷彼疑，如經：若有比丘實得阿羅漢者，若不信是法，無有是處。等故。

③云何堪說者，從佛聞法而起謗心。云何如來不成不堪說法人？為斷此疑，如經：除佛滅度後，現前無佛。如是等故。

④云何不成妄語者，如來先說法異今說法異，云何如來不成妄語？為斷此疑

故，如經：舍利弗！汝等當一心信解受持佛語，諸佛如來言無虛妄，無有餘乘，唯一佛乘。故。乃至童子戲，聚沙為佛塔，如是諸人等，皆已成佛道者，謂發菩提心行菩薩行者，所作善根能證菩提，非諸凡夫及決定聲聞未發菩提心者之所能得故，如是，乃至小低頭等亦如是。

譬喻品

舍利弗說偈：

金色三十二 十力諸解脫 同共一法中 而不得此事

八十種妙好 十八不共法 如是等功德 而我皆已失

此偈示現何義？舍利弗自呵責身：我不見諸佛、不往佛所聞法、不供養恭敬諸佛、無利益眾生事、未得法退。是故，舍利弗呵責自身。

不見者，不見諸佛如來大人相，生恭敬供養心故。

往者，示現教化眾生力故。

放金色光明者，見佛自身異身得無量功德故。

聞者，能作利益一切眾生故。

力者，眾生有疑，依十力斷疑故。

供養者，示現教化眾生力故。

十八不共法者，遠離諸障礙故。

恭敬者，生無量福德，依如來教得解脫故。人無我法無我，一切法平等故。

是故，舍利弗自呵責身：我未得如是法，於未得中退故。

自此已下，為七種具足煩惱性眾生說七譬喻，對治七種增上慢應知。

又三，種染無煩惱人三昧解脫見等染慢，對治此故說三平等應知。

何者七種具足煩惱性人？①求勢力人，②求聲聞解脫人，③求大乘人，④有定人，⑤無定人，⑥集功德人，⑦不集功德人。

七種增上慢者，

顛倒求功德增上慢，以世間諸煩惱熾然而求天人妙境果報。對治此故，說火宅譬喻，應知。

聲聞人一向增上慢，我乘與如來乘無差別，如是顛倒取。對治此故，說窮子譬喻，應知。

大乘人一向增上慢，無別聲聞、辟支佛乘，顛倒取。對治此故，說雨譬喻，應知。

實無而有增上慢人，以有世間三昧三摩跋提，實無涅槃而生涅槃想。對治此故，說化城譬喻，應知。

散亂心實無有定，過去有大乘善根而不覺知，彼不求大乘，於狹劣心中生虛妄解以為第一乘。對治此故，說繫寶珠譬喻，應知。

有功德人說大乘法，而取非大乘。對治此故，說王解髻中明珠與之譬喻，應知。

無功德人於第一乘不集諸善根，說第一乘不取為第一。對治此故，說醫師譬喻，應知。

第一人者，以世間種種善根三昧功德方便令戲，後令入涅槃故。

第二人者，以三為一，令入大乘故。

第三人者，令知種種乘諸佛如來平等說法，隨眾生善根種子生芽故。

第四人者，方便令入涅槃城故。涅槃城者，諸禪三昧城，過彼城已，令入大涅槃城故。

第五人者，示過去善根令憶念，教入三昧故。

第六人者，說大乘法，以此法門同十地行滿，諸佛如來密與授記故。

第七人者，根未熟為令熟故，示現涅槃量。

為是義故，如來說此七種譬喻。

何者三種無煩惱人？染慢顛倒信故。①信種種乘異，②信世間涅槃異，③信彼此身異。

為對治此三種染，說三種平等應知：

- ①乘平等，與聲聞授記，唯有大乘，無二乘故；
- ②世間涅槃平等，以多寶如來入涅槃，世間、涅槃平等故；
- ③身平等，多寶如來已入涅槃，復示現身自身、他身法身平等無差別故。

是無煩惱人，染慢見彼此身所作差別，以不知彼此佛性法身平等故，即彼人我證此法、彼人不得。對治此故，與諸聲聞授記應知。

彼聲聞等為實成佛故與授記、為不成佛與授記也？若實成佛者，菩薩何故於無量劫修集無量功德？若不成佛者，云何虛妄授記？

彼聲聞授記者，得決定心，非成就法性故。如來依三平等說一乘法故，以如來法身與彼聲聞法身無異故與授記，非即具足修行功德故。是故，菩薩功德具足，諸聲聞人功未具足。

言授記者，有六處示現，五者如來記、一者菩薩記。

如來記者，舍利弗、摩訶迦葉等眾所知識故，名號不同，故與別記。

富樓那等五百人、千二百人等，同一名故，俱時與記。學無學等俱同一號，非眾所知識故，一時與記。

與提婆達多記者，示現如來無怨故。

與比丘尼及諸天女記者，示現女人在家、出家修菩薩行者皆證佛果故。

菩薩授記者，如〈不輕菩薩品〉示現禮拜讚歎言：我不輕汝，汝等皆當作佛者，示諸眾生皆有佛性故。

言聲聞授記者，聲聞有四種：①決定聲聞，②增上慢聲聞，③退菩提心聲聞，④應化聲聞。

二種聲聞，如來與授記，謂應化聲聞、退已還發菩提心者。

決定、增上慢二種聲聞，根未熟故，如來不與授記。

菩薩與授記，菩薩授記者，方便令發心故。

又，依何義故，如來說三乘名為一乘？依同義故，與諸聲聞授記。同義者，以如來法身、聲聞法身平等無差別故。以聲聞、辟支佛異乘故有差別，以彼非大乘故。

如來說言不離我身，是無上義。一切聲聞、辟支佛法中，不說此義，以不能解故。是故，諸菩薩行菩薩行，非為虛妄。無上義者，餘殘修多羅明無上義。

無上義，有十種應知。

①示現種子無上故，說雨譬喻。汝等所行是菩薩道者，謂發菩提心退已還發

者，前所修行善根不滅，同後得果故。

②示現行無上故，說大通智勝如來本事等故。

③示現增長力無上故，說商主譬喻。

④示現令解無上故，說繫寶珠譬喻。

⑤示現清淨國土無上故，示現多寶如來塔。

⑥示現說無上故，說髻中明珠譬喻。

⑦示現教化眾生無上故，地中踊出無量菩薩摩訶薩等故。

⑧示現成大菩提無上者，示現三種佛菩提：

(1)應化佛菩提，隨所應見而為示現故，如經：皆謂如來出釋氏宮，去伽耶城不遠，坐於道場得阿耨多羅三藐三菩提。故。

(2)報佛菩提，十地行滿足得常涅槃證故，如經：善男子！我實成佛已來，無量無邊百千萬億那由他劫。故。

(3)法佛菩提，謂如來藏性淨涅槃，常恒清涼不變故，如經：如來如實知見三界之相，乃至不如三界，見於三界。故。

三界相者，謂眾生界即涅槃界，不離眾生界有如來藏故。

無有生死，若退若出者，謂常恒清涼不變故。

亦無在世及滅度者，謂如來藏真如之體，不即眾生界、不離眾生界故。

非實非虛，非如非異者，謂離四種相故，有四種相者，是無常故。

不如三界見三界者，如來能見能證真如法身，凡夫不見故。是故，經言：如來明見，無有錯謬。故。

我本行菩薩道，今猶未滿者，以本願故，眾生界未盡，願非究竟故。言未滿者，非謂菩提不滿足故。

所成壽命復倍上數者，示現如來常命方便，顯多數過上數量不可數知故。

我淨土不毀而眾見燒盡者，報佛如來真實淨土，第一義諦攝故。

⑨示現涅槃無上故，說醫師譬喻。

⑩示現勝妙力無上故，說餘殘修多羅應知。

多寶如來塔顯示一切佛土清淨者，示現諸佛實相境界中種種間錯莊嚴故。

塔者，示現如來舍利住持故。

量者，方便示現一切佛國土清淨，出世間無漏善根所生，非是世間有漏善所

生故。

略者，多寶如來身一體，示現攝取一切佛法身故。

住持者，示現諸佛如來法身自在身力故。

示現無量佛者，示現彼此所作業無差別故。

遠離穢不淨者，示現一切佛國土平等清淨故。

言多寶者，示現一切佛土同寶性故。

同一塔坐者，示現化佛非化佛，法佛報佛等皆為成大事故。

自此已下，示現法力、持力、修行力應知。

法力者，五種門示現：①證，②信，③供養，④聞法，⑤讀誦持說。

四種門〈彌勒品〉中示現，一法門〈常精進菩薩品〉示現。

〈彌勒品〉中四種門者：

①證者，如經：我說是如來壽命長遠，時六百八十萬億那由他恒河沙眾生得無生法忍。故。

此言無生法忍者，謂初地證智應知。

八生乃至一生得阿耨多羅三藐三菩提者，謂證初地菩提故。

八生乃至一生者，謂諸凡夫決定能證初地，隨力隨分八生乃至一生，證初地故。

言阿耨多羅三藐三菩提者，以離三界中分段生死，隨分能見真如佛性，名得菩提，非謂究竟滿足，如來方便涅槃故。

②信者，如經：復有八世界微塵眾生，皆發阿耨多羅三藐三菩提心。故。

③供養者，如經：是諸菩薩摩訶薩得大法利，時於虛空中雨曼陀羅花。如是等故。

④聞法者，如〈隨喜品〉說應知。

一法門，讀誦持說者，〈常精進菩薩品〉，示現者，謂讀誦解說書寫等，得六根清淨故。如經：若善男子善女人，受持法花經，若讀若誦若解說若書寫，是人當得八百眼功德，乃至千二百意功德。故。

此得六根清淨者，謂凡夫人以經力，故得勝根用，未入初地菩薩位應知。如經：以父母所生清淨肉眼，見於三千大千世界。如是等。

又，六根清淨者，於一一根中，悉能具足見色、聞聲、知香味觸法等用，應知。

眼見者，聞香能知，如經：釋提桓因在勝殿上，五欲娛樂，乃至說法聞香知者，此是智境鼻根知。故。

持力者，有三種法門示現，如〈法師品〉、〈安樂行品〉、〈勸持品〉等廣說法力，應知。

其心決定知水必近者，受持此經，得佛性水，成阿耨多羅三藐三菩提故。

修行力者，五門示現：①說力，②行苦行力，③護眾生諸難力，④功德勝力，⑤護法力。

①說力者，有三種法門，〈神力品〉中示現：

(1)出廣長舌者，憶念故；

(2)警咳聲者，說偈令聞故，聞聲已如實修行不放逸故；

(3)彈指令覺悟者，令修行者覺悟故。

②行苦行力者，〈藥王菩薩品〉示現教化眾生。

行苦行者，〈妙音菩薩品〉示現教化眾生。

③護眾生諸難力者，〈觀世音品〉、〈陀羅尼品〉示現。

④功德勝力者，〈妙莊嚴王品〉示現，依過去功德，彼童子有如是力故。

⑤護法力者，〈普賢品〉及後品中示現。

又說言受持觀世音菩薩名，及受持六十二恒河沙諸佛名，彼福德平等者，有二種義：①信力故，②畢竟知故。

①信力者，有二種：

(1)求我身如觀世音，畢竟信故。

(2)生恭敬心，如彼功德，我亦畢竟得故。

②畢竟知者，決定知法界故。法界者，名法性。彼法性，入初地菩薩，能證入一切諸佛菩薩平等身故。平等身者，謂真如法身。是故，受持六十二恒河沙佛名、受持觀世音菩薩名，功德無差別。

第一序品，示現七種功德成就。

第二方便品，有五分，示現破二明一。

餘品，如向處分易解。

妙法蓮花經論優婆提舍

受持及讀誦 讚歎並宣說 福慧俱增長 災障悉消除 現眷咸安康 先親得超昇 見聞與隨喜 皆共成佛道



妙法寺 香港新界屯門藍地 <https://www.mfbm.hk>